

舊堂集

仁

gift
NO LONGER PROPERTY OF
HARVARD-YENCHING LIBRARY
HARVARD UNIVERSITY
2 DIVINITY AVENUE
KR
AUG 31 1970

詩誅



Digitized by the Internet Archive
in 2018 with funding from
University of Toronto

舊堂先生文集目錄

卷之一

詩

卷之二

輓

誄

卷之三

疏

書

卷之四

哈佛大學哈佛燕京
圖書館珍藏印

書

卷之五

書

卷之六

祭文

卷之七

奉安文

行狀

卷之八

行狀

墓誌銘

卷之九

傳

序

記

跋

銘

上梁文

字戒

卷之十

附錄

輓詞

祭文

行狀

墓碣銘

舊堂先生文集目錄

舊堂先生文集卷之一

詩

次鄭逸人士仰

宗魯

北溪田家雜興韻

有懷閒居友行行越川野
綠溪路復微隔水問菜女
新僑雜村屋小庭不容圃
青青摠民田無地種禾黍
野蔬不盈掬盡日小澗渚
曉夢驚官角春城亂村杵
此居近城市問子何所取

之子性本靜味道如真腴
在山樂採樵在水甘釣魚
隨遇卽安之無處不幽居
窈窕望春郭碧樹多粉榆
濯髮前川曲歸來卧吾廬
清風時動戶明月不待呼
郊居亦

勝事何須羨蓬壺

但喜古人書不喜今人識衣冠修而靜顏貌多古色門
無肥馬客窠有抱子翼杖策或徘徊入室復偃息事事
皆適意盡日衡門側朝出步前野夜雨萬金直小婢學
田家農飯趁早食

蕭散復蕭灑依山白茆屋巷没人稀到簷靜鳥穩宿勸
兒勤讀字時觀村童牧遠樹迷古驛大野圍平陸林斧
晚丁丁有懷歌伐木若有同志者何須厭追逐

人生苦役役多從此中老是以寒泉翁滄洲付吾道難
爲俗人言誰與開幽抱飛潛各愜性出處隨所好所貴

君子道不與同腐草努力願及時田家春尚早

好田多黃卷一架勝千畝蓄畚方有秋聖賢可與友遺
韻龍門琴餘醺邵翁酒奈何今之人襟裾牛馬走獨愛
顏巷春之子門前柳吾黨正屬望後學待開牖矧惟先
大老典刑垂北斗丁寧故人意君能不孤否

村童罕識面柴門卽鐵關萬事皆擾擾讀書方覺閒誰
知經濟術虛老林泉間靜和陶潛句悄對謝眺山不識
門外道何憂行路艱我欲往從之高風正難攀安得結
芳鄰朝暮對好顏

僻陋小村巷半山半荒野中有一老生華髮如夔女家

貧不營產庭荒不理園自笑天皇氏不分粟與黍懶性
亦懶釣游魚自在渚小婢不逢嗔日午方朝杵慵惰固
無匹百無一長取

縵袍而佩玉土炭如膏腴經綸太迂濶時夢清渭漁四
十耻無聞安宅曠不居青春不相貸夕陽滿黃榆蕭瑟
陳篇架寥落先人廬春睡起常遲簷鳥亂喧呼鄙吝滯
十重方寸愧冰壺

兒時多妄計却嫌小見識文讀秦漢書詩愛陶謝色白
日虞韶庭復擬蹌蹌翼志業何晚晚萬事迄可息河水
清且漪伐檀空在側村嫗笑腐儒疋布也不直早知但

如此不如耕田食

先祖垂燕謨遺我詩書屋着跟在平地吾人有歸宿隨
分偃且仰不妨樵與牧人心苦走作日暮行大陸春風
滿東陌好鳥先集木我馬已黃玄胡爲更追逐

村翁憫我飢告余治農畝抱火燒荒根鑿沙問田友田
功謂不難崇飯兼盃酒農事反多事僮僕日奔走挾岸
擁破沙防水插疎柳歸來誇老妻高枕卧虛牖老翁見
大笑秋來獲幾斗書生正迂拙經綸只此否

青氈不畏盜夜門常不關一日無憂病聊作一日閒吁
唏唐虞志往往宵寐間日暮有所思無語對雲山世態

浮雲變人情蜀道艱羣哲去不回遺蹟誰能攀但願今年豐妻子無苦顏

與柳士極

逢夜話養堂占律贈別

淡月依稀不辨誰八門先拭兩眸疑意中高客今何自
江左歸驂曩有期人散不妨談古事夜深尤喜聽新詩
臨分爲誦先生句細想幽軒小睡時

讀書偶吟

歲月悠悠逐水東乾坤今古一閒中通書讀罷思濂老
觀物吟成效邵翁賭醉喫糟何有益還珠沽犢笑無功
明朝欲費蒙衝力上灘何時沛順風

看心經

無虞無貳帝臨威理在吾心儘至微不測而神元易出
莫知其嚮恐忘歸祇遵退訓常尊信肯把筌翁更是非
吾道人間嗟已矣此中功業正看稀

觀物吟

一番微雨一時晴一扇和風一夜聲驚動蟄虫無數化
感來飛鳥自然鳴柳如兒髮髮長草似牛毛細細生
造化到來均化物無爲非是却無情

又吟一律兄弟聯句

靜處方看動處奇朝來無事起遲遲
兄臘痕畱着輕輕

王春意先登裊裊絲

身

九澤霜禽歸北日七龍蒼宿正

南時

兄

誰將物物都分付天道元來貴不知

身

感興絕句

日暮滄洲路歲晏金丹約瑤琴空寶匣誰與語幽獨

俗離遊山時次行中登字韻

登山終日復山登碧樹紅霞爛欲烝僧帶夕陽巖下沒
溪涵峯影鏡中澄霜前秀色峭千尺秋後精神碧萬層
此去俗離八十里風烟知得幾分增

到清溪吟一律

八月西遊天氣晴山樓日落暮鍾清千年水繞甄萱國

萬壑雲歸百濟城古寺烟霞僧有分新秋風月客多情
三更得句翻成笑臥聽東巖瀑布聲

次寄趙明叔

文達

愛爾江村水石幽麥風四月野生秋今宵不耐江南夢
明月娟娟上屋頭

一曲清江半畝居十年門掩古人書潭花夜雨催消息
幾點飄飄幾點餘

次族兄李明氏

炳然

韻呈黃嶺旅榻

君去詩畱篋思君每誦詩北風寒雪夜最是夢中思
門前溪水自東流不見故人使我愁不見故人空見月

心隨明月到湖洲

終夜難成一律詩
娟娟遙隔美人儀
爲君欲寄寒梅信
春意新歸雪後枝

立春又呈一律

臘月看過又立春
今宵何處守庚申
千篇古簡聞中友
一點懸燈客裏親
歲去鄉愁應不耐
寒歸山意忽生新
山西聞道多君子
別是新知問幾人

己酉秋夕寓感

佳辰吟病閉門過
誰道今宵月色多
粉樹光陰驚白露
虹橋消息隔銀河
此翁本自疎狂甚
是夜無端慷慨何

難與俗人論素抱玉壺三擊一悲歌

遊安義華林洞君子亭

山高人已遠苔老跡猶存
入洞尋真趣潮流問活源
正宜君子號竊取野翁言
百世遺餘馥溪花向客氤

詠重修悟昨堂

我屋頽然度幾秋
春來營得撤桑謀
因循歲久無長策
經始年回幸再修
依舊足容三四世
從今除却百千憂
但將餘日爲閒漢
靜對新牕誦孔周

追惟先祖昔勤勞
前哲徽謨戒燎毛
隻手愧非支厦木
危舟幸賴上灘篙
長教義夢來高枕
更拂龍光起古刀

此意可銘非敢謝他時歸拜我曾高

漢江舟中偶吟

吾生五十可知天何事頻登漢水船
稷契初心渾妄耳晦陶遺緒更茫然
閒隨夕鳥歸雲際傾似朝葵向日邊
野老無他圖報術田家拜送太平年

謹次金持平

導

渴睡軒韻

我不尤人孰我尤向人惟說
聖恩優草堂春晚蒲床
穩銀漢秋高曉夢畱自是曾懷如履坦
都將榮辱付歸休知臣莫若吾
明主試看華名掛屋頭

伏次

御製賜姜知樞文

杭

回榜韻

九十朝天豈有希丹忱只爲謝恩歸歸來手奉宸章
語四百吾東此事稀

伏次靜窩從叔父心統性情圖韻

靜而爲體動而生一箇心中具性情不有先生言統字
幾乎名義未分明

伏次從叔父山泉齋韻

養拙平生一仕天數緣書室筭居然辛勤只爲閑來後
衰老彌汲慕往前倘賴神明扶氣力庶從閑靜奉周旋
區區解識藏修意非直風光一壑專

咫尺村家別洞天山齋物色正依然課程絃誦宜冬夏

節友松梅繞後前月日佇看蛾子化步趨無失蟻封旋
將來成就誰多少惟在諸君立志專
明牕新闢向東天紅日朝朝照煥然先聖千言遺卷上
長程萬里此門前工夫有序宜循進日月如流恐不旋
欲做人間奇事業一心須向六經專

次家弟誨之夜坐靜吟韻二首

珍重何翁訣丁寧爲爾傳夜分形像外詩靜月星邊無
處非斯理吾心亦是天此君堪與語相對小燈前
詠角夜中句庶將不負身心追先聖則學要古盤新豈
是能言鳥知爲率性人及今加勉勉毋失好青春

避暑香庵畱數日誨之曰暑來見歸以一韻吟

示因次贈

前宵星彩動長庚分付巖雲不掩眉
老弟忽衝三伏熱煩襟頓覺十分清
聯床暫借看經日開卷因論入學程
省事最宜情性養時時好意靜中生

避暑鳳庵看四子書次誨之

一日閒居一日仙八旬方覺少塵緣
已過魯叟從心日猶少周卿講道年
赫赫如臨明命帝惺惺還愧瑞巖禪
諸君莫笑吾衰甚此老餘年此案邊

再從弟子希次鄭上舍明應

必奎

雪月韻以心

爲諭故和其韻還贈子希

寒宵雪上月皎皎來相尋問爾何皎皎千聖一片心

喻心體

疑曙鳥驚宿封巢鶴難尋誰能獨不變試看松栢心

喻立心

煖爐香一炷疎梧影十尋默然對黃卷吾身有吾心

喻存心

事當白如彼理須明處尋二字明與白是爲君子心

喻治心

風打飛如掃雲暗去無尋物累元如此可畏非人心

戒心慾

追次子希老先生集中韻

春壇瑤瑟舍鏗然氣象當年異數賢
我髮欲晞風日暖眼前沂水綠生烟

右舞雩風詠

漢家匡復太平辰何事羊裘掩一身
文叔可能三代上不須終老釣臺綸

右桐江垂釣

漣葛先生夢葛天風流非是竹林賢
東風拾得潯江絮覘水歸來一喟然

右槩里歸耕

亭亭爾是物中賢賢者方知愛是蓮
問爾那能清若許淡然花葉夏天然

右濂溪愛蓮

雲水西湖一棹還王梅溪處笑盤桓誰知處士清真趣
已入君王畫裏看

右孤山詠梅

一園藏得萬家春豈似寒江獨釣綸獨樂何如與衆樂
推將此意濟斯民

右洛社獨樂

虹橋消息半沉浮曲曲清溪可泳游欸乃一聲山日暮
孤舟洄溯水源流

右武夷九曲

圖中荆益是奇珍三國乾坤卧一身大義何論成敗數
百年要爲保王春

右孔明草廬

花錦苜蓿三月天一春和氣自家全輕轡穩逐東風轉
十二窩中處處傳

右康節兒車

與子希避暑甲長庵讀朱書拈出明道先生容

字韻識感

肅我之心疎我容盥巾不敢待牕紅人生歲月徒虛枉
天賦賢愚豈異同那致此身千載上共隨諸子一堂中
笑他百喙爭喧鬧直是薛門鳴吠雄

清涼界裏坐從容不怕三庚火傘紅分榻閒教兒輩做
對床穩討子希同尋常自棄甘爲下七十無成愧受中
倘有超然名利者許君真箇大英雄

贈長水使君柳弟象遠

尋春

君在家鄉日閨中一處子聲未聞叱咤色未見怒詈朝

夕日怡怡所樂一瓢水誰知幽臯鶴聲徹九重裏昨日
拙秀才居然民社主據以毛生屈爲君書面喻僊俛謝
君恩板輿榮老母世事忌圓滿天理正難究千古黃
崗淚到官時未久念君所遭惡萬事應無况耿耿老兄
憂日夜天南望時聞載路頌傳說猶難準爲省姑母候
一驢踰嶺峻時惟大火流月魄生過半四日始入境驅
馬故緩緩或近酒壚傍或憇田疇畔仍問爾邑宰爲政
有何聞皆曰吾太守賢哉來何晚商旅願入市夜狗眠
在杆含笑復上馬日暮到官衙案牘無訢牒官閑如在
家從容做萬事精神貫一理誠信服吏胥齋潔奉神祇

惟恐或瘠民不憂不肥已終夜不敢惰清晨趁風起所
聞諒非虛老兄顏有光簡而能制煩柔而又濟剛庶幾
儒者治儘非流俗吏愛切望之深或恐猶未至將此區
區願申以加勉意家世本清白君性元淡泊歛民以自
利雖勸必不欲令人有恆言爲官貴威猛然後抑豪強
乃可行吾政然後戢奸猾乃可立吾令催科與徵租不
可無毒杖苛細爲精詳刻酷相專尚余嘗竊歎息此非
君子言人性本無惡天賦同一原一日苟行仁吾民卽
歸仁以人苟望人人道自人人寧有化不得只在以善
導是以聖人訓蒲蘆喻地道儒教武城絃不欺明道僕

傍人揔大笑古道謂難復君惟所見同常常講之熟化
民與成俗吾君今日貢莫患做去難只信平生學使民
如承祭宜先齋以禮不大聲與色可以興孝悌况茲十
室邑亦有忠信士聞風必興起安得不歸美民情大可
見莫如同好惡隱痛須細察痾痒勤摩撫苟能視如子
孰不愛如父雖柔豈可茹剛亦不可吐峽路多崎嶇入
心亦難恃夙夜宜戰兢浚薄如臨履大抵爲政要不出
一敬字以是酬萬變何事濟不能九重分憂意庶可粗
效承令名以貽親真是孝養兒臨別意益切爲贈一篇
詩老生陳腐談迂濶不合時不以芻蕘棄萬一少補而

柳象遠南子稿

漢稿

諸友與子希及諸少輩會

蓮庵講心經五六日而時有憂故恨未參聽

以心字韻寓感奉呈

自有吾人有是心如何心學壞於今情車役役迷途遠
慾浪滔滔泔水深求放要須腔裏在探真室向箇中尋
諸君欲識靈丹驗看取光風霽月襟

十有六言一箇心相傳相受啓來今茲經於是爲功大
附註還知用意疲才氣過人非足畏吾儒論學貴窮尋

清朝起詠牛山木爲向諸賢整我襟

蓮庵在牛山故也

當年興國兩賢心後輩分明又視今第一奇遊同志會

無端冗故老年淩存公只在操而捨枉直何論尺與尋
欲往從之不可得願分餘瀝洗塵襟

次高友

時樂

畱別柳象遠韻還贈高友行軒

一別長溪八九年幾重雲岫幾重川那知老少俱無恙
促膝今宵坐弊氈

送子南歸迫暮年况今冰雪滿前川未知何日重相見
爲惜餘香不掃壇

次柳象遠書窩韻與羅戚

致祥

酬唱

山之南畔水西濱小構成時返主人不負宿盟尋渚鷺
爲存恆敬整頭巾偶來高客孤燈夜正是和風二月春

千載心期何處問清潭一片照冰輪

村深愚谷是遐陬一別終南道路悠竊擬獨園司馬叟
緬思清洛臥龍湫栽來山竹粧籬砌畱得江風送夏秋
濯髮歸來時復詠冠童六七是吾儔

齋豈無端等吾知有所思江清恆對鏡沙淨若均節數
墨開蒙少尊丌儼聖師行藏料理久裘葛任天時
數架林窩足易安殘篇日月奈將闌聞君爐火成文武
應有囊中九轉丹

巖齋夜拈韻贈金友公輔

東隱

清齋來伴老朋遊江水無風淡淡流喚起沙鷗成晚契

不妨相對雪霜頭

次族叔士閱

錫獻氏韻

聖明臨北闕大事在西行
成敗何論數死生只竭誠有
書皆勉意無老不吞聲
至重吾南責如何誤托輕

書懷

好箇男兒事業長悠悠
日月送尋常三年不詠詩
全澀十載多憂書頓忘
橡實秋山歌杜公草堂春
睡卧南陽時時點檢生涯
笑四壁家無甌石藏

又一律

修齊然後做治平
幼學元來壯欲行
安石豈徒爲祿仕

仲舒非是愛功名憂深漆室周嫠歎喜讀窮山陸子兵
天地範圍都可笑謾將經術好經營

道院講席次李德懋

敬儒韻

場屋紛紛一俗流及當衰朽始知休如何喚起諸賢友
濫向江齋坐上頭

觸處生疑闕者多看看渾是霧中花但將一語諸生勉
須及桑榆日未斜

德懋又用前韻咏泛月求和故次之

靜虛樓下遡清流借得浮生一夜休忽有波聲篷底急
船行始覺近灘頭

吾輩清遊興太多白頭還笑似蘆花夜深却恐驚鷗夢
回泊西臺月未斜

甲長庵讀朱書有感

偶入清涼界閒看朱子書工要涵養熟道是顯微俱霧
捲山全露蟬鳴響有餘終朝無語坐心靜學禪如

登甲長上峯占一絕

此山頂上卽蒼空空裏流行一理公遊子莫省山外面
天心元不限西東

次甲長庵韻

碧岫連天一色藍最高頂上最深庵麗王迹遍名稱甲

零祀神尊實奠南何夜放光和尚塔分明傳鉢法師龕
道場聞說增清淨肯許塵蹤放鹿潭

遙看雲樹翠如藍庵在其中不見庵詩債尚畱蓮社裏
禪筇不渡虎溪南忽將救世龍藏鉢喜聽傳經鶴舞龕
爲問主翁無恙否瑞巖秋月印寒潭

次甲長勝遊錄韻

并小序

余之屋後青山卽此山一未嘗從容遊覽向年蓮
坡上人重拓道場山顏倍新於是一鄉耆碩遂追
白傳蓮社故事賭成一番勝會卽太平盛世事也
余適齋居又不得奉杖屨周旋每瞻望雲山深歎

夫自家分數終始塵累多而清致少今夏爲避暑
計約子希攜數卷書二三子姪就靜于茲庵殆旬
望一夕乘涼登上峯周覽因思向時勝遊不覺悵
然徘徊蓮師以一帖進曰當日勝蹟在此盍觀焉
乃樂聞而敬閱焉則自八十尊老至六十以上幾
三十員以下之數又過之剛翁以錄中首老旣序
而記而跋之并與其諸員姓名及所詠詩什而手
書之其文氣高健筆力勁正如出少壯手顧此高
山絕頂上得有此大耋之會者極是稀貴事而是
文與是筆尤豈非稀貴事耶詩則吾堂父靜窩公

實首唱之也子姪私心又切幸其恬養有素精力
不衰遂以賤名附之卷末因以拙吟謹次以伸向
日未躡後之恨云爾

誰道雲山只麼空姓名畱得列仙翁茲山勝蹟無加此
不必煩登上上峯

閒中偶吟

志氣還從血氣衰聰明非復少年時詩如淡粥全無味
學似荒田頓不治閱世方知行路險存身真覺閉門宜
時將病眼尋行墨一二床頭子姪兒

過茂朱邑

峽圻清江出天開盡閣斜地靈藏別界官府似仙家綠
樹餘朝霧赤城挹晚霞寒風樓上景頓欲筆生花

謹次金文

斗範

竹園十景韻

新成春服拂塵埃名利關頭念已灰千載尚餘曾點興
乘風吟去帶風來

右風乎臺

前塘止水十分清濯去纓塵更洗精灑落靈臺無一累
主翁不待喚而惺

右浴乎潭

一柱中門倚小崗終朝不掩納山光問翁何事開幽徑
爲向西園日理荒

右日涉門

數行疎竹緣叅差小院無入獨坐時涼籟細生明月照

此君幽韻更清奇

右脩竹院

虎攫龍挐氣鬱盤清陰圓轉綠蒲團明堂不願爲梁棟
只許幽人坐卧閒

右盤松亭

靈源混混出山陰不但清冷爽我襟愛爾盈科流不舍
幾時能到大江濠

右源泉

一峯孤島月如圓宛在中央碧水淵莫是東流鰲背出
三分一落此亭前

右月島

數重雲樹繞簷端剩借清風五月寒無事閑翁常起懶
臥聽閑鳥響喧喧

右雲林

風雪柴門冷不開一枝貞信暗香迴寒山歲暮吾誰與

聊挹心期托爾梅

右雪梅

九月霜秋菊花芳臨風三嗅愛馨香呼之以弟因爲友
明月來時倒林觴

右霜菊

次申和卿

鼎利

東遊錄韻

東自青鳬夏西遊名山真面竹筒幽白雲尚繞歸時策
明月應多卧處樓安得翩翩跨鶴背自憐衰颯已霜頭
浮生勝事元非易許子詩眉不俗流

又次周王山韻

周王去已遠讓國不知年特地峯如削撐天勢欲顛長
雷雲氣白時見鶴裳玄始聞茲山說儘知別有天

與諸伴避暑道塾留話數宵因成聯句

壬戌秋光是夜清風流耆會不期成姜清林溪隱約微

傳響趙士蒼月徘徊更有情威堪老仙鄉顏髮皓刺沽村

酒笑談傾趙誨悠悠今古存亡感更把瑤琴意不平姜幼

道

用聯句韻各一律

虛襟相對十分清話到三更睡不成前輩藏修知有意

後生悄悵各傷情非關野性明時老尚有葵忱向日傾

吾不解棋猶解局笑看殘劫一番平

又用前韻奉勉諸同志

顧波汨汨苦難清鄉里何時善俗成偶得幽閒聊適意
都將榮辱已忘情存身自愛昆蟲蟄歇脚何憂世路傾
惟願少須無死我佇省天步泰階平

次姑射山庄詩軸韻呈主人朴定于

鼎洛

我友迢迢在碧山茲山云是別人間仙源消息花流去
周鼓遺音石帶還問爾於中何所樂讀書然後此心閒
天雲水月惟相管門外紛紛摠不關

讀書寓感

不知吾已老可笑世稱翁學稼嫌樊小揚聲愧朔雄披
書如有味掩卷却無功點檢平生事到今大脫空

次孫宜仲老圃韻

不知圃叟是何人
謝病江郊寂寞濱
混跡甘爲漁釣伴
教兒好做鹿鳴賓
三更枕上平安夢
四壁家中自在春
老圃知非真學圃
此翁於此樂天真

紛忙世界一閒人
蕭灑茅蘆近水濱
淡味畦蔥空伴麥
幽情場藿可淹賓
幽詩誦罷聽田雨
社酒賒來臥巷春
文繡膏粱都不顧
翁家世業本清真

申士玉

光璣

精舍次故友姜癯翁

世文

遺韻

勝地天慳若待君
一江風月浩無垠
爲藏小艇垂堤柳
知有靈蛟起渚雲
肯許庸人來取次
已知清槩出凡羣

風高野廣多秋氣天際無痕一點氛

一曲灣碕直萬錢幽人宜枕石頭眠烟波滾滾無窮已
雲影悠悠更淡然朝雨牧簑青草外夕陽漁棹白鷗前
名亭廢起知非偶古碕遺銘歷幾年

贈金都事

龍見

行路人間自古難勉君珍重步平安園花發處風多樹
溪水流時石起瀾萬里在前憐髮翠九天臨上愛枕丹
須將此老區區意隨地從容立脚寬

避暑香庵偶吟

殘年劇怕老炎威十日東庵宿翠微雲氣朝從深洞出

僧聲暮帶薄陰歸靜中自有真消息塵外何關浪是非
意到看書眠到卧不妨終日客來稀

夢侍

榻前賡進韻

一堂和氣涕吁時御座如天寶袞垂還愧野禽非
鳳緣何來作舜庭儀

夢覺後自笑

斯世經綸已晚時九天雲翮笑低垂緣何做得唐虞夢
獲覩光華日月儀

讀南野集有感慕之意敬次感興韻

吁咈唐虞素志遠窮廬還復仕長飢殘年邈矣追前哲

萬事徒然愧昨非
案上詩書時翫味
世間榮辱久忘機
自知畢竟無聞鬼
不敢高談性命微
卧病春來久掩廬
短筇扶出似翻車
滄浪濯足徒由爾
太昊浮雲且任渠
有感高吟南野韻
興懷仍展霽山書
殘年秉燭嗟無補
還愧床頭食墨魚

次贈權性吉二首

自知於世不相宜
搖落空深宋玉悲
忽對十年心上友
仍求千古卷中師
惟先住脚方高步
然後看書也解疑
萬里前程元在邇
臨分把手勉前期

爲學工夫自有眞
心天要得淨無塵
分陰可惜床頭日

所樂宜尋巷裏春靜聽言談皆謹拙細吟詩律更清新
不知五十湖南域有志如君問幾人

次涑水明倫堂重修韻

吾鄉首勅揭虔儀正德年間立是祠羣哲迭興前後世
講宮重起定中時儒風庶見回今日嶺運休言向夕曦
九朔勤勞諸老意也應千載永畱辭

翼翼齋宮復舊儀一層生色肅清祠吾儕幸老東周世
奎運重回盛宋時夜淨江天來霽月朝開書卷對新曦
庶幾絃誦從今日爲賀區區獻拙辭

丙寅冬上鳳庵奉閱墳麓兩更集拈出集中天

君韻

半畝靈宮一任虛至今荒廢七旬餘
空侗面目常依舊
鹵莽工夫未復初頑似商辛慢帝命
放如周穆敗皇輿
回頭點檢吾家計破壁頽垣四面疎

謹次西厓先生無題韻

人間日暮摠浮雲悄掩寒山落葉門
無角誰云穿我屋
笑聽噪雀滿林昏

丙寅九月與李幼成

壻

李公訥

敬儉

諸老伴約

會牛山凡數十餘人屢日穩討之餘上蓮庵
忽憶古人九日龍山飲之句效成五言一絕

九日牛山飲黃花笑老人不教風落帽還復整烏巾

填麓集中有師弟相和之韻疊成累首發致警

省拈出敬次

可怕銛鋒一利鎌碧如秋水冷如蟾韜光可蘊明珠積
代燭空隨皓月簷已把汞鉛磨鏡面莫教鋒穎露錐尖
何時淨盡吾曾次不帶塵埃一點纖

敬次兩叟讀黔澗遺集有感韻

三百年來歲迭推孱孫追慕不勝悲風塵慷慨忘身日
潦灝行藏合義時月老記中曾有友桐翁筆外更須誰
慙歎太古閒窩韻一倍生光我祖祠

敬次集中未發氣像韻

此時難以語言形冲漠都無一念萌淡似大羹寧有味
自從虛室自生明七情未見分哀樂百物非關較重輕
惟有延平真見得自家心體十分清

此翁堪愧具人形曾裏無端草木萌霧靄長留終日暗
電光消息霎時明在中氣像那由見向外身心只自輕
但覺年來差寡慾庶幾收保本源清

敬次王澗亭酬唱韻

別區林壑隔風塵兩叟當年卜等因一斗窩中遊太古
四時胷裏自佳辰擔來宗匠斯文責喚起英才幾箇人

手奉遺編三敬讀此身渾襲一團春

百年瞻仰艷光塵孔李通家幸有因學聚大成君子業
遯肥甘老太平辰何年東拂臨函席是日聞風起懦人
古砌寒梅如有信應畱清馥保餘春

夜坐書懷

人間幸矣罔之生七十餘年底事成落日崦嵫山頂掛
危關人鬼路頭行千年世遠人亡感四海天寒歲暮情
惟是一端今夜氣靜中消息澹然清

次都聖世

南都

杞菊亭韻

功名事業總區區養性吾知善養吾君子元來甘淡泊

閒翁自有靜工夫小哉寧似樊須圃清致非徒賀監湖
杞菊叢叢歌一曲爲誰延佇抱琴孤

桃李門前耻向陽化爲靈狗解仙方俗人莫道無滋味
苦淡方宜處士腸

右詠杞

傲視嚴霜獨不腓主人籬下淡香非主人與爾將終老
歲暮心期兩莫違

右詠菊

道中口占贈羅戚

致祥

不忍相分手更摻爲聯癯杖代羸驂春山送客青回面
江水含情綠作潭肯墮塵窠長汨沒擬收風物盡東南
不難尋得青陽宅四壁蕭蕭一草庵

贈羅威

相逢却問太何衰
顏面依稀昔別時
之子豪遊真快活
此翁拙業愧修治
燈燭話舊還生感
夜靜論襟轉覺宜
吾輩如今嗟已矣
詩書惟願兩家兒

顏髮雖衰氣不衰
一節南北六旬時
暮途行李須珍重
隨處持身貴檢治
白首重逢那得易
青春作伴好還宜
須將昔日泉源感
說與床頭後輩兒

呈再從兄

毅然

遙望化寧山
秋槐如兔目
欲寄相思字
淡月連山白

送姑叔柳公

九洑

昨夜飲傾白玉樽
平朝送客洛江濱
霜深灞渡無楊柳
折取青松寄去人

齋舍敬老宴歌

獻壽歌獻壽舞北望千祝
聖人壽宮中聖人壽八臺
漢祖唐宗皆未有
廷臣拜頌姬文德
夜夜雲漢昭回章
玉盤頒賜壽民丹
黃耆老人多四方
昔聞聖君善養老
三王乞言五帝憲
誰知吾東一千載
復覩殷庠三代遠
獻壽舞獻壽歌
吾家大母八十三
尊行內外餘一老
落髮復生玄髮鬢
朝日對窓能紉針
兩耳細聽傷人言
自道年來善噉飯
含飴坐弄諸兒孫
族曾祖母壽過之氣

候九十猶無恙小孫慶賀不容祝二母無疆百壽享歌
獻壽舞獻壽更向庭前拜諸祖漁軒大父精神清雲谷
老祖髮垂素諸祖七十又六十吾家一堂都壽域少年
青春共起舞彩袖凌飛雜華席日暖風熏酒如絲滿座
熙熙樂聖德酒闌再拜記其事今夕何夕歲在丑

庚戌七月十八日書堂慶宴時詩

純祖誕生時

天佑我東我王生子邦家之光列宗元嗣我王今
日載弄璋止於休我東億萬年無疆之休
天佑我邦聖子作止維此庚戌瑞運複止我王今
日載笑撫止我喜如之何不知手之舞之

天祐我民誕降我主瑞日出震萬物咸覩我王今
日載笑抱止我樂如之何不知足之蹈之
天佑孔厚寶籙綿止我王千年元子千年歲歲年年
太平休福民則何爲維日用飲食

舊堂先生文集卷之二

輓

南野先生朴公

孫慶

輓

太白盤東海，小白橫北昊。二靈合元氣，五宿藏光耀。先生乃間氣，其氣配義道。早於不動訓，浩然善養吾。歎息科舉累，誤了今之儒。超然發高笑，閉門先人廬。仰契羣聖心，俯讀諸子書。俯讀復仰契，沉潛窮吾年。未得如飢渴，既得便欣然。爲學不在他，其道孝弟先。晨夕上堂堂，聲色日怡愉。日月斯邁征，湛湛樂友于。踐履皆實行，工夫又存省。珍重單傳訣，程門一字敬。儼然若泥塑，整齊

垂衣紳歛我英豪氣歸之肺腑春天君旣泰然外物無
一嬰年高德又邵學優道自成妙道誰與語瑤琴正希
聲往往發之言天機自然鳴陶謝卻無色韓柳猶屑營
信知有道言流出天然性先生非有意文章亦何盛人
謂先生學宜爲吾黨師多少斐然子願言一從之先生
卻退讓自言學不足人謂先生文可以銘金石車馬日
紛紛尺書加束帛先生益驚瞿揮手都謝卻大德一何
謙所守知確牢縱爲斯世恨益見先生高聲光終難藏
九重已聞名自歎吾衰甚恨未報 聖明一區南野庄
永守烟霞盟春日前川柳霽月晴窓梧蕭然復淡然落

落出塵區世間真豪傑然後方丈夫小子自齟齬夙聞
先生風半世高山仰一窺宮牆崇凝重如山岳淵濔如
洪鍾于時坐春風不覺整頭容未敢執經問但願公明
學耿耿緇衣誠悵詠生芻谷天何喪斯文忽易大夫簣
威鳳不常出靈蓍曷易得賢季亦高隱一時何凋落聞
道大山翁前月又大歸賢哲俱寂寞已矣吾道非

輓金子河

中柱

曩者余與公及洪光之八尾鳳山中有旬日
之遊以五言數十韻相聯成句以附古人言
志之意而其一聯曰自愛心如玉誰憐劍澀

苔卽公之句也余咏歎久之曰此句甚雅潔
無一分向外意思謂此子必不作吾輩人無
何而果爽意勇脫謝舉子業從大方門下得
聞程朱說杜門求志囂囂有林下終老之意
焉嗚呼吾黨朋友間固非無好箇資質而能
超然不拘從師問道以來世斯文之責爲己
任者豈多得哉使公假之以年其進德修業
之工知必爲江右後學輩歸宿之地而一何
吾黨之祿去益涼薄使一箇碩果未保不食
之理悲夫悲夫去冬過公於省谷舊庄則公

之靜攝已累月矣自言病有難起之慮而顏
色尚紅敷談笑如平日笑我以安於小成而
不肯聽人說話因謂屯巖遺址新等數架小
亭林壑頗窈窕可意要與一者相攜共棹東
洛孤舟有窮溯仙源之約矣未數月人事之
變至此顧此失相瞽偃偃獨立誰將與歸悲
夫悲夫

高樹清蟬近日悲一書何處道相思可憐江浦茫茫淚
千古斯文斷送時

科目壞人甚異端人間枉了幾儒冠超然獨脫吾儕累

早服春爐九轉丹

寒水清冰貯玉壺眉間不帶一分麤端莊之色從容步
知佩程門敬字符

山鳥巖花小洞幽數椽亭子傍滄洲滄洲日暮權歌晚
孤興時乘夜渡舟

古家家法若朝廷冠帶清晨拜亞庭退向薰爐黃卷對
主翁無事喚惺惺

吾道年來子庶幾惠然攜手擬同歸嗚呼天喪斯文矣
從此江西歛膝稀

一哭吞聲更一言送君猶可慰君魂師門已幸朝聞道

歸卧重泉也不冤

愚山處士出郊村曩日相逢拭淚痕歎息共悲吾黨事
出門誰與意中言

自憐青鬢半成銀十丈塵坑墮在身愧負當年知己勉
至今猶作未歸人

輓審幾堂黃公

啓熙

麟角祥姿瑞鳳儀憶曾夫子八門時吾家季祖直方叟
命我先人以友之

一氣蒼間暖似春芙蓉秋水更精神冰肌玉髓清相映
千百叢中獨秀人

善惡關頭一字幾單傳心訣最精微試看此老名齋意
平日工夫盡在斯

橫溪秋水隔蒼葭湖上春風和櫂歌一曲滄洲歲月晏
閒中無事讀書多

司馬青衫笑晚榮三公不換古溪亭世間清福誰能似
春滿山家玉滿庭

鄂不韡韡常棣華古人詩什盡公家老妻尚識賢兄性
香林濃樽泛菊花

白華西望淚橫流昨日少年今白頭安得暮回灘上楫
桃花春水訪漁舟

自古賢人不朽云也知芳躅異浮雲今宵吾黨何君子
步月初成墓誌文

輓姜知事

頭容堅直口洪音快鵬精神雪鶴襟慷慨時需憂世淚
尋常耿結報君忱風裁早未冠峨笏天渥猶看帶拖
金筵席一言宜上賞時人誰識老臣心

雲漢昭回國老門粉袍丹舄摠殊恩千年生色商山
面百代流芳晉水源爵一豈無今世貴達三誰似我公
尊分明移得龜疇九更獻南山萬壽樽

先人嘗以丈人稱公則忘年托晚朋甚喜清朝同象笏

只期暮夜共羣燈
潦晴到處謀行止
書牘隨時間寢興
珍重一篇知己語
至今孤子淚眶凝

輓金持平

昔我家大夫西遊洛城歸
歸來對棗床從容語依依
當世非無人暮途知音稀
惟有同心子先進字某氏
氣味真冲淡襟期自坦易
長河去不由大道平如砥
對面生和風聽言無邪思
蓋厥所存主忠信爲田地
休休有容量斷斷無他技
秦書一介臣今世惟此子
以之事吾君國家尚有利
以之治吾民必有濟
喜此同聲氣遂以托心契
素純羔羊皮逶迤公退食
青燈泮水村共聽

街鍾宿或討遺經義劇談王霸術揀取三代金脫落漢
唐鐵幸而遇唐虞許身期稷禹回頭笑名利幾人患得
失得之行吾道不負平生學不得歛吾道歸且範鄉俗
用舍非在我行藏惟隨時二月漢城春共和田園詩隨
處戒顛沛永言同扶持今行得此老吾黨其庶幾因以
婚姻約申申勗季公小子時在傍受言藏之中痛迫先
人業不幸早零落于時知舊謀聯翩累百幅公詩最哀
傷字字寫心血記實春陽句交道雲龍說惻惻重嗟惜
德音垂八律嶺運終屯蹇公命亦抹殺淅瀝西山夕一
投馬曹笏歸卧東岡坡渴睡名其軒渴睡寧真渴未敢

念君言耿耿丹心結迢迢銀漢隔倚杖時逍遙悠然對
小白誰知經濟術虛付烟霞谷一片小園林家居亦可
樂矯矯荀氏龍琳琳謝庭玉坐垂義方訓卧聽詩書讀
不聞怒詈聲但見怡愉色白髮小阮翁須臾不離側日
夕晚省庵談笑與之同一家都和氣四時長春風世稱
陳大邱門似柳河東豈徒鄉里羨足爲一代式家國惟
一致言行何其綽向者先人語平生已相識分明北斗
名千載朱鳥翼生爲瑞世鳳歸御清都鶴存順沒又寧
君子復何憾嗟哉大嶺南居然折中嶽悄悄立昏衢誰
能揭明燭人情摠浮雲世路多荊棘吾道日以窮何恃

不爲恐哀此早孤兒益增感舊痛倘使先人在應有知
已哭淚記家庭語聊陳分誼篤

輓金正言

墜

山如軟畫水如紗人物生來種種嘉名祖聞孫仍世德
祇今文獻丈人家

瑞世麒麟一角奇婦人孺子亦皆知一分害義傷仁事
勸使爲之也不爲

開吾城府倒吾困多少言無不告人藹藹皆從腔子出
自家渾是一團春

一醉仙桃夢裏還宦情斗覺十分刪晚來經濟烟霞暮

臥對村西小白山

清晨愉色問慈幃蒼髮班班舞彩衣有喜親顏頻顧笑
滿庭兒誦白華詩

明道詩中靜趣同閒來無事不從容清床散帙抽籤罷
喚睡時從渴睡翁

尚書喬木小城隈古老猶傳掛鼓槐十世芳聲猶不歇
榮祐頻渡漢江來

君子嘗言誅長非小生猶聞昔人譏寥寥一語終無已
爲說先人舊契私

輓金叅判

夢華

白髮丹忱坐曝暄
兩朝殊眷感頻繁
夢中蓮燭春坊
淚嶺外金貂特地
思出處隨時吾道在
歸來無恙盛
名全餘光畱得槐卿月
長照青春種德門
一枕高顏對典墳
南湖月白淡生雲
樽前氣槩回三代
著上精神露十分
清廟正空瑚璉美
瑞毛爭覩鳳凰文
龐床記得前秋拜
經歲醇醪尚帶醺

朝天仙路拜
恩時二月蓮山夜
雨悲馬白遙知來范
老山青空使哭鍾
期星霜幾度經風樹
壽祿方看滿月
危有淚不勝今日慟
可憐相對兩家兒

姜晉恩君

必香輓

一片心天露半看雅談溫笑對人時拙如閨女恆棲靜
清似壺冰不染緇青鬢幾年遊洛社白頭歸日更鄉儀
斯翁不可終緩也淚誦三章綠竹詩

喬木春風動古查菊園生色淡香葩兩兒驥步雲前路
三世鴻恩嶺外家爭道圓甌無欠缺那知造物便揄揶
回頭更向諸孤語爲念家邦勉意加

樊巖蔡文肅公

齊恭

輓

賤不敢誅貴禮也顧嶺外寒士何敢僭猥於
大相國輓誅未知孝子所以千里寄幅者
抑家庭燕侍之際或有所聞諸夫子耶昔

年不佞一候於貞洞之寓屏時先生方退
閒角巾燕服隱几而坐即使之前曰若是
先大夫子耶先大夫嘗直樂院時余亦夙
夜在公相與邛其中而得其素養許亦最
歎惜乎早世矣以先大夫恩勗吾子子其
勉焉不佞不覺感涕交頤遂起而拜因乞
一言之重要以責幽局公曰是吾責也當
俟暇日何待強伸後家弟學洙中司馬帶
恩禮謁公眷眷道舊誼亦如是云弟鄉野
之人性本拙澀只知干謁之爲嫌不知先

契之爲重每將進而輒趑趄瞻望如霄漢
終未敢更乞容尺地申請其前日之所蒙
許而未蒙惠者又未嘗與孝子侍郎一夕
過從續講世好而不意賤名亦入記存中
至有此俯索寂寥語且驚且訝雖不敢妄
自臆揣而意者先人故耳亦何敢自外焉
至若大人先生之出處去就文章名節威
德大業之昭在人耳目者太常已獻議太
史當備書將閱千古不朽矣賤末小生復
何敢塵穢

先人曾自四仙樓盛道當時第一流五彩文章祥鳳下
萬尋滄海老龍遊將來吾黨依爲重從此邦家恃不憂
庭下丁寧吾有受果看星斗掛天頭

士女長安西巷橋薤歌和送太平謠做成洪業肩房杜
遇得明時翼舜堯已聞金城排萬鏃終看磐石重三朝
彤裳赤舄龍崗夜也化箕星上紫霄

一幅書中一字時赤心披寫墨淋漓自言識路齊桓馬
人謂良方李老醫會看千秋昭日月那知當世失著龜
分明一斗腔中血猶有人間未了悲

輓李剛齋

承延

卿月名家有道門
斧泉爲祖息翁孫
藐仙倬約冰爲髓
赤壁依稀鶴返魂
紙墨堆中成契活
黨庠遂上坐深尊
三章綠竹詩餘興
有斐斯翁不可謏

背郭幽居靜且閑
廣文三絕妙人間
麒麟瑞角悲荒野
鸞鵠爲文章阻玉
班家學謹追先祖
範仙基笑對古商
顏
耄年尚費眞珠惠
洞徹荒原幾處山

擎天臺上白雲悠
泮水燈前昔夢幽
平地神仙瞻鶴髮
故人兒子愧霜頭
峨洋舊曲絃誰續
哭誄遺文篋尚畱
安得人間床下拜
更承回笑拭青眸

輓李進士

黃恭

匡子螢床董子帷不嫌霜髮鬢邊垂常言不讀餘何事
黃卷書中有我師

識博才高志大期一心猶惜分陰移青春題塔渾餘事
只道文章是不知

簡兮之氣綽兮儀夷曠襟期個儻資春酒三杯良友席
太和風味更看宜

無方孝養不時需酒宿高樽火伏爐枕上三時衣不解
一團誠愛聽於無

戀戀懷中一姪孤鯉庭詩禮使同趨辛勤百念先諸子
泣道吾兒尚有吾

十年牢閉小柴關誰識貞姿守歲寒
梅菊一庭疎影裏主翁心事共平安

歲暮無人託郢斤知心惟有一毛君
可憐篋裏千金史畱待侘年後子雲

翁家聞似鄧林田養得奇材正蔚然
果是不誣前聖語人家樂有父兄賢

一夢依然對翠軒春風顏色笑談溫
慙勲謂我通家少佩我香蘭贈我言

輓洪進士光之

天休

人間知己我光之桃李山西洛水湄
物表芙蓉清出水

風流楊柳裊垂絲應緣宿債畱塵界誰識前身是穎師
一榻青春當日事峴峯雪月掛如眉

山南旗鼓馭蹇驢到處先登趙壁虛黃鳥春風豪興客
綠籃青鬢少年渠當時眼目全牛小謂子功名拾芥如
何事天生才雋士兩場司馬止斯於

其友平生其友知蓋君才志俗流稀心期虞殿工歌和
想慕春壇點詠歸假令自家行蘊抱庶幾吾黨有光輝
公然三載雙眸疾不幸男兒萬事非

前年五月問君病牽我冠衣手撫摩酒後情談多慷慨
病中詩格益嵯峨正憐丹藥無功甚共恨滄洲暮歲何

笑指楣間畱宿債慰言爲子洗秋波

江東日暮慘惓雲吾友新春奄忽云雛鳳學飛毛始彩
慈烏啼恨血成紋嗟嗟病目瞑何得事事傷心欲不聞
寥落江山無主宅篋中誰拾萬金文

輓柳公

聖霖

整整衣冠儼若儀對床終日不欹移晨梳罷了開藏火
朝沐晞餘濯瘦軀鄙俚平生寧近口貧愁至老不登耆
欲知主靜程門訣須學斯翁燕坐時

天性寬和量有餘大家風味更醇如治心常目靈丹訣
翫味終身孔氏書一事何曾爲己甚八旬猶自戒虛徐

自云不學吾云學誰識工夫若此於

蕭然鶴髮映韶顏春日如年靜復閒
歸若靈光臨魯殿重如喬岳鎮商山
鄉隣孰不著龜敬契少無非子弟班
爭道是翁應百歲後生將見起顏頑

先人昔日事之兄猶記當年二父情
風樹至哀爲子罪海籌相賀有兒誠
時從床下承溫教庶佩襟前勉此生
小子嗟呼終薄福我公今又九原行

古里柴桑曰渭陽眼中人事更滄桑
尚省文獻經三世可惜蘭芽折一芳
素篋尚畱黃卷友青氈還付白頭郎
何時更侍春風座穩蘂薰爐一炷香

輓盧丈

漢文

千頃洪波黃叔度三盃醇酒邵堯夫自家腔子仁都是
萬事曾中礙處無天下舉皆公坦易世間何有路崎嶇
野堂三老春風席尚憶當年樂友于

輓盧丈

斗文

野老幽居近峽斜草堂風物半烟霞園收錦里先生栗
門掩青山謝眺家志業奈於衰鬢雪風流都付錦囊花
可憐一片牕前石槐雨蕭蕭老古查

巖下清泉泉下池詞源長不枯琉璃題名往蹟懸明月
有淚回頭憶俗離高調復生蘇老後正音追復盛唐時

籬邊獨也青山立哭盡平生又哭詩

輓金丈

洪鳴

謹於爲禮篤於仁博大衣冠重厚身性分自全初賦受
心機不設小畦畛長開好面迎堂客留得和風滿座春
大字楣間百忍號小生常欲敬書紳

一榻一爐一几閑百年無物攬心間笑看秋葉紛紛世
不學春華艷艷顏朝日晏餘攜綠杖午眠罷了對青山
八旬享盡人間樂仙駕翛然又大還

鶴髮蕭蕭平地仙寒梅牕下菊花前自天有佑多清福
浮世無憂送大年祖考常稱龍伯子先人頻拜德公筵

可憐舊日通家少來哭秋山落照邊

輓柳持平達甫

先志

嗚呼吾達甫許多人世債上負邦家債下玉售良賣煌
煌白玉堂可飾芙蓉佩化爲龍樓燭又可四目代金閨
咫尺阻奇珍忽閔彩耿結報君忱九原應未解中負大
嶺債聲價直千金如駒出渥洼如木抽鄧林又如遷喬
鶯春風懷好音庶追文忠業光前復光今爲君爭拭目
何如吾儕心中途遽相失令人淚滿襟下負門戶債古
家支一棟共臥阿季枕同餐大家甕大兒始學字小兒
啼在裙寒妻面常光萬事惟恃君一朝爲破瓦百債徒

山積事事都未了何時了可得

輓權通伯徹

槐雨城東喚小名我冠纔勝子襟青奇珍新琢荆山璞
高價爭推薛劍萍笑指前程脩萬里猥將交道託平生
分明今日南湖路祖馬踟躕故不行

耿介容儀樂易心馨香臭味潔清襟不關門外煩音聒
祇喜床頭好友尋志業漫將書卷付鬢毛其奈雪霜侵
家聲尚賴名兒在庭下他時滿樹陰

海東名節大賢家義理由來熟講磨世道無嚴陰亢日
書生發憤氣成霞風霜威武何能屈金鐵肝腸益可嘉

痛矣三庚炎海毒八年終未祛沉痾

輓金承旨幼精

疎宕襟懷重厚身百年江表偉然人文章沛若滔滔水
談笑渾然習習春堯舜君民心上責聖賢書卷意中親
不欺二字丁寧教 先后當年識罪臣

塞外風霜二載寒歸來感淚血成瀾憂時雪髮千莖白
報國葵忱一片丹豈料江天驚弋鴈復從仙閣列班鵷
可憐篋裏千金寶畱待揚雲後世看

世交尊在丈人行不敢將年較短長自笑野謳無律呂
時拚仙佩聽璆璫猿腸應斷三千海鶴髮渾疑數十霜

何日九原重把酒細論千古好文章

輓洪掌令清仲

漢

昔子從師卅角時勝溪秋月照心期醇醪自有眞淳味
汗血終非局促姿希調孰憐清廟瑟故人惟識紫芝翁
知君此去無歸日後死同庚可耐悲

輓朴處仁

漢 詰

前秋消息卧床云將把黃花笑問君今日吾行何太晚
黃花委雪君乘雲

依依談笑正堪聽夢裏疎眉淡淡青疑是綠荷清出水
半江秋雨立亭亭

勤於職事篤彝倫宜族宜家愷悌人吾必謂君能學矣
豈徒心性自天真

野翁珍重作模楷君是門庭子弟佳正我衣巾垂我帶
一床書史靜茅齋

有客時時自北方來時云醉峴西觴醉人以德還非酒
姻友衰顏覺有光

阿嬌不教養寒閨送八高門愧駸迷歸道舅家如父膝
八年無一恙泉懷

君家雛鳳我家郎丹穴奇毛備五章何不借君春樹歲
剩省他日羽儀祥

如畫雙眉騎竹兒
喚爺何去不知悲
分明耿耿泉臺月
懸在庭梧最弱枝

枯落窮廬可笑人
自憐頭髮便成銀
暮年多少相須意
何日重逢話舊姻

歲暮天寒雪滿山
子車何事渡危灣
赤城洞裏紅霞窟
聞道羣仙許上班

輓朴聖和

鼎梅

匣裏琴心璞裏珠
不求斯世不尤人
居家最樂惟爲善
率性平生自任真
已識至誠分
多日夏間追孝奉
繁辰如教太史書
其實無愧青山數尺珉

蘆竹魚蝦近海洲世居還不羨封侯
幾家待舉寒隣火小井頻投好客
輶豈曰無衣安縵布自云乘馬厭驂
騶天資去道知非遠難得斯翁末俗
流

識荆之願結姻緣又是同庚不偶然
每恨相思三百里不知此別幾千年
九原應祝螟蛉類萬事猶存叔季賢
最覺吾生涼薄甚白頭孤立暮途邊

輓張能國

壽民

玉山精秀小崑崗玉出其山箇箇光
能國澄然清削骨環奇七真是玉中
良

碧蕙衣裳明月襟芙蓉華佩琅玕簪
相逢揖我青青袂

省宇之間藹見心

苗而纔秀秀而華實欲成時風雨多二月東風桃李陌
思君不忍見春花

先生詩禮古人書吾友平生從事於孝悌元來天性也
詞華燁燁乃其餘

江山柴掩小桐村彩服斑斑古篋塵嗟爾季兮悲莫哭
上堂誰慰大夫人

斷腸腸斷小閨昏萬事人間不欲云但願孤兒無恙大
風流文彩更如君

輓申汝承

光緒

滿地風波獨立身眼前飛劫海生塵詩書孔壁藏無恙
光氣鄴城鬱未伸白首苦心知者友自家東義質諸神
如翁可謂全歸孝無愧泉臺拜大人

麟閣丹青謾爲誰晚年還復味書詩一枰碁罷餘閒興
三日瓢空不病飢賁獲吾知難奪志風霜渠豈敢摧眉
壯哉望八南遊履快覩天壇日出歸

憶曾延我上賓恣情義綢繆五十年難及事多人道上
可觀風致酒盃前春來擬跋三宵燭宿債空留一馬鞭
非久且當從此逝不須相別淚漣漣

輓金孝承

宗範

苦語不欲盡哀哭不欲長猶有不自已仰首詰蒼蒼
大旱得甘雨太祖佐命臣源深澤流遠種種奇偉人
赫赫平陽烈昭昭大東誌中葉極峻茂名家聲不墜
君來承大統古木夕陽時手輓已頽運大廈力扶支
清冰貯一段春花爛萬枝每戲君氣象軒冕也可宜
疾惡如鳥喙好善如芝蘭華堂履舄錯滿座摠衣冠
快倒三四甌滌蕩千萬愁高談仍復笑優哉好風流
生此奇男子天心如不偶何將古家棟一朝遽摧朽
蒼茫君家事良平亦無奈但願君伯季加餐益自愛
百世不遷廟只託五尺兒乃祖然在上庶幾默佑之

輓張士悅

敬穆

有才未必皆有德有德未必兼有才天旣資君豈弟德
良才又是梗楠材少日翩翩翰墨場汗流走僮籍湜輩
脚下前程萬里脩人言青紫如拾芥人間可笑吾輩事
窮廬歲暮成枯落古來有才多無命風塵不須愁落魄
君子及時宜進德聖人稱驥不以力曩年相逢笑相勗
莫如讀書餘年畢地僻山深古伽倻晴窓棐几閒日月
有泌有泌衡門側愛是溪名一字勿聞道年來靜中業
潛心節酌諸賢訣多君秉燭恆兀兀愧我無聞今八耄
不知堯夫自呈書畱在巾箱幾編秩吾當不久歸泉下

膠擬續牙絃絕

輓孫都事聖際

會慶

滿面春風一味醇不隨浮俗變天真
喧囂世界公平議名利關頭懶拙人
可使翱翔登殿陛如何潦倒卧風塵
正憐半世功名業只博紅蓮一幕賓

西山西望哭吞聲一閉玄扃萬事冥
哀彼女家還客地忍言孤子戴寒星
牕梅獨返春消息籬菊猶存古典刑
花月君家知未濟芳陰佇看滿槐庭

輓李進士仲章

天慶

寬大衣冠長者人自家風味更淳淳
襟懷坦若平衡路

談笑溫生滿座春
千卷詩書優事業
一江漁釣付經綸
鄉鄰共仰靈光殿
八十康寧足驗仁

數椽蕭灑四餘齋
風月圖書面面皆
暮境工夫恆秉燭
東牕春睡懶開柴
弄清臺古悠悠
感主靜窩空踽踽
懷二字特題儒老
卒人間日暮奈吾儕

輓申德明

昌教

文藻羅含宅清風
子敬趨性純如赤
子心靜似高禪
基局酬閒友書床
對古賢草堂高枕
臥清福一生專

并世同庚又如何
會面疎曾襟欽坦
爾氣味愛淳如佳
子流芳久賢咸發
軔初送君多慰語
何必爲虐裾

輓僑窩成丈

涉

江曲蕭然屋數椽
閉門高卧送殘年
詩工自古窮而後
學博誰今長者前
黃卷聖人刀上儼
滄洲明月意中圓
欲知多少斯翁業
須讀巾箱東燭篇

三夜清燈侍几隅
德音珍重勉踈迂
自言謝客門常掩
一笑逢君病欲蘇
正值黃花開北砌
不知梁月墜西湖
此生何以酬知遇
回首幽明愧負辜

輓族叔士閔氏

孤塾春風拂袷衣
夕陽攜手詠而歸
當時六七詩童伴
才調如公最絕稀

旗鼓山南主藝盟
墨地粧出上林鶯
林鶯百轉流香語
添作新翻樂府呈

同谷悲歌七曲傳
有才無命古來然
生涯不必長鏡柄
手把殘書送晚年

謹拙持身處子如
一生吟病守寒廬
落花啼鳥渾閒事
門外紛紛一任渠

資如溫玉臭如蘭
素月襟期一片團
好友逢場困廩倒
不知清夜五更闌

兄弟三人共白頭
邁征相勗古家猷
萋萋墓草何山宿
落日薤歌又院邱

衰門氣象日乖偷日暮招招立渡頭舟子不歸風起浪
撐篙誰與上灘流

今年新月始圓時追遠齋中枕共欹豈料一旬連夜話
人間歡愛盡於斯

誄

誄金澤卿

允鍊

子思子曰君子素其位而行不願乎其外余讀至此章
未嘗不三復而歎曰今人多不識一素字凡百云為率
不免向外走作去而吾姻友金斯文澤卿南惟守拙安
分於見在所居之位而無慕乎其外區區愛慕之意不

憂澤卿之簞瓢而竊欽其澤卿之素安在於簞瓢之中
又不恨澤卿之才早廢舉業而竊喜其科舉之累不能
病澤卿之心頃年枉陋時以憂道不憂貧求志不求名
之語交相勉戒邛其晚年所業則誘掖子與姪六七秀
才使各隨才成就其所與遊者皆修身端潔之士而如
文雅豈弟之金斯文相敏氏隱居行義之權徵士思潤
氏最所相信而篤好者也蓋公資性溫潤如良玉操行
幽閒如處子相對則如逢陽春眉宇間藹然見子諒之
心胷中炯然明澈無一點塵累公旣以如是天資其見
得又平易真實於自家本分上所當行者而篤行之絕

無一分浮躁慕外之念故居家處事各盡其當然之則
爲人子則盡其誠愛而親心常安樂爲人弟則盡其友
愛而和樂且湛爲人夫則和義備至而如鼓瑟琴以至
於宗黨朋友莫不推類而盡其道行年五十餘無一事
爲人所疵議者則嗚呼吾黨如此人豈可易得耶聞哀
集古君子格言要爲開蒙牖後之資云使此書得成當
作斯文上好文字而惜乎天不假之壽卒未得究竟事
業悲夫悲夫顧此殘骸今且衰朽盡矣竊計頭上餘年
能復作此世客幾何也若四十年從甥妹之義三年辜
負之恨早晚相從於九地之下當從容一論罷復何必

舊堂先生文集卷之二
二
三
慼慼語以斷我老年殘緒也惟願兩胤子謹守素分克
肖乃翁之德乃家孫又孝謹世世如乃祖耳詞曰

世之友以風流我之友謹雅人之取以名藝我之取拙
素如蘭者子之臭如水者子之味青山一片石不知何
人特書處士良貴

舊堂先生文集卷之二

